

卷二十一

父 子

古谓父子不同舟，盖思风涛一旦并命绝嗣也。与老子压石磨、缚大绳观井同。

《续博物志》以鯀为颡帝之子。

夷狄禽兽，知母不知父；都邑之士知尊称；大夫知尊祖。诸侯及太祖。天子及始祖。

吕向生父岌客远方不还，少丧母，失墓所在，将葬，巫者求得之。不知父在亡，招魂合诸墓。后有传父犹在者，访索累年，不获。他日朝还，道见一老人，物色问之，果父也。下马抱父足号恸，行人为流涕。玄宗闻，咨叹，官岌朝散大夫，赐锦彩，给内教坊乐工，娱恱其心。

程大中先生自撰墓志，子六人：长应昌、次天锡，皆幼亡。次明道、又次伊川两先生。次韩奴、蛮奴，皆夭。女二，席延年、李正臣其婿。

父子与庆成宴

嘉靖四年郊祀庆成宴，大学士杨廷和子慎、左司马姚镛子涑皆为修撰，大司马金献民子皋为检讨，皆父子与宴，为盛事。三公官高有名，而皆有子，其子爵位清华而皆不甚显，可见际遇极盛者，亦造化所忌，与而不必尽兴也。况下此者乎？

三及第子

父为显官而子赐及第者，程襄毅信子敏政、谢文正迁子丕，皆至侍郎；白恭敏圭子钺至尚书。当时庆成宴亦必并与，特非同同时耳。至子为显官而班于父之上者，往往有之。子居津要而父为卑官末秩，忘在得之戒者，尤不可胜数也。

两翰林父

翰林父为官者甚多。乃余年友吴曙谷阁学父一龙岁选知高邮州，方严有品格。林兼宇宗伯父煊章，乡进士，官参议，温裕有才情。庚子外察，阁学方为编修，以使事抵州署，长跪促归。阁学子有举乡书者。宗伯子铭鼎，会魁、莱州太守。

同居异室

吕文穆公父母以口舌相戾，遂异处，交誓不复嫁娶。吕既

贵，泣请同居，然终异室而处。

学士少年牧豕

曾学士桀，少不得于父。父督之货豕，豕突蹇其足。又息不丰，逐之。学士即牧，手书策不弃。遂擢大魁。事父至孝。

贤 母

陆天全完为冢宰，母夫人叶氏贻书以物禁太盛为戒。陆败籍没，叶亦逮诏狱，神色怡然。后出狱，死于长安官舍，人咸智而伤之。叶之幼也，庭有积水，一儿溺焉，女伴曳之，愈沉，叶夺而纵之，儿遂起，识者谓有司马公之风。

冯南江父子忠孝，人人知之。然当被逮考掠时，讹言汹汹，欲籍其家。家人奔溃，其母吴氏挈孙行可入京，沥血为疏奏曰：“儿戇无状，万有馀罪。但妾临年，不忍见子刑戮，愿身赎孤以延嗣息。”事虽不报，而行可卒申其说，未减戍雷，犹得补考续，封吴太孺人，世庙英明，宁可溷清，盖亦深鉴慈德而默以旌之矣。御史归，遂葺慈训堂以居。今御史父子有词，而于太孺人竟何如也？

我郡守栗公祁，号东阳，东昌夏津人。余年十二，以童子试，望见之，白晰丰下，岳岳有神，清操振绝。公生一二岁孤，母萧，年二十二，抚之，贫甚，一夜风雨大至，抱儿起坐，壁坏压焉。邻妇举火照之，颓楹覆砾，室中之物皆齏粉，母子被发裂裳，体肤皆无恙，遂持长斋以报神贶。后公为山西参政，歿。萧尚在，教二孙时中、用中，有才名，世其家。

栗饮量甚洪，过吾里董宗伯宅，巨觥犹未洽，睨海斗，可容

三斛，侍者持以前，戏曰：“此泰大，不能任。”宗伯即以寿，平饮自如，将毕，又曰：“不可再。”凡三进，乃怡，就坐，畅饮而别。然公颜色不变，若未尝饮者。迁官抵苏州，一面繁，乃衙中物。母夫人见之惊，令役持还。

李及泉颐，母夫人张氏有贤行。怀妊时，流贼入境，往山穴避之。适其兄遇于涂，曰：“彼穴人众，不可居，余家近地可避。”遂从之去。甫入而寇至。寇退，往视前一穴，则石崩，百十人皆齏粉矣。及泉守我湖，有名，余出其门。后官右都御史治河，闻命不悻，到官即歿。盖有先兆也。

少宗伯张玉阳，名一桂。既卒，母太安人刘氏治家，斩斩有法，裕于宗伯存时，诸孙皆成立为诸生。年九十一卒。

严 母

韩莲峰，名绍宗，为宪副。母张氏，严甚。莲峰为刑部郎中，配阎氏，亦两封至宜人矣。张氏命阎与嫂负水，莲峰归而见之，命二隶人为代。张怒，持杖迎出，将击之，以杖指莲峰骂曰：“汝有皂隶，可令代；无，则不吃水耶？”莲峰笑曰：“媳妇身强有力，岂不堪负？嫂子薄弱，且有妊，是以代之。”张怒乃解。张生莲峰数月而孤，后上其事旌之。即韩苑洛之祖母也。

贤 继 母

平湖沈晴峰修撰，生三岁，母俞卒。鞠于后母张，甚有恩意，忘其为俞母出也。少善病，忽剧，梦一妇携之去，曰：“若真吾子。”有髯翁夺之归，乃苏。以质大母，具言被服容止，则俞母也。于是始知所出，而张母抚之益厚。公荐乡书，俞母复见

梦。为史官，事张母甚孝。张母至欲全以产付公，令毕父丧及己身后事，而后分所生子。相守二十余年乃卒。盖继母之极贤，而俞母得安地下，修撰得报父。若前后母亦近世最难得者。修撰有文学，以科场事见纠，调外，不复出。有《贲园集》，为时所称。

三柄臣母

柄臣之母，其因子享荣华，不必言矣。然先歿而犹蒙子之休者，在昔为宇文护母阎氏、贾似道母胡氏；有后歿而蒙子之辱者，在今为张江陵母赵氏。其余大臣非无存者，然气焰岂敢埒三臣之盛？宇文之母先陷于齐，赎归；贾之母先为婢，有赈，寄于其寮，故不得与张母比。要之，天下大福无得全者，又可见天道矣。

钱袁二母

钱钺，杭州府昌化县人。以都御史更抚山东、河南、贵州三省，继娶曹氏。钺以正德二年卒。前在贵州裁抑中人恨甚，言于刘瑾曰：“钱钺显宦，积赀钜万。”瑾信之，构河南禄粮事，籍其家，无所得，毁屋及墓。勒民倍直，阖境骚然。执曹氏以下凡五十六人以北。严寒，困顿几死。械系久，狱不可成，诸大臣争之，司寇山阴王鉴坐免官。竟分戍固原、庄浪、肃州三处。曹过涿州，病痢，剧甚。诸子仓皇号泣，治后事。忽遇异人授真人养脏丸，一服即愈。再逾年，为正德庚午，会赦得释。家人亡者过半。行抵关，瑾诛。诏罪状瑾，以都御史钱钺受害为言，于是还其封诰及故籍物。任子应福，亦录用为福州推官，孝养备至。至嘉靖十五年卒，年九十一，子六人。一妇人，更盛衰之际，中遭

奇祸，卒以免，晚更荣华寿考，吁！亦奇矣！必有大过人者矣。

袁文荣以会元及第，受世宗眷遇，拜相，可谓盛矣。然素性跌宕，未几，以病乞归。道卒，无子，时为嘉靖甲子。其夫人管氏携嗣子扶柩归，独持家秉加毖。嗣子夭，复再立。事其伯及抚弟侄有恩，事继姑张甚恭。张没，临葬，病不能送，柩重不可举，管舆疾至，乃举。又赈贫饲饥，所行义事甚多。万历丁酉卒，年七十九，去文荣歿凡三十四年。然则文荣氏一枝奇卉，而夫人则袁之根干也。人生在自立，何必分男女哉？

兄 弟

张九龄之弟九章、九皋，性孝友。尝泛海，兄弟异舟，风涛大作，中夜漂泊，自分俱没。诘旦，并在津亭，馀舟鲜有存者。皋至御史中丞、南康郡开国公；章经略节度使。诸子俱显贵，魏公浚亦其后云。

安福彭文宪公时以太保赠太师，超六资，同时三从弟文思公华以少宰乞归，不允，特升太子少保、礼部尚书，又乞归，乃允。先朝之优礼儒臣乃尔。彭氏一门得二，盛矣，盛矣。文思父贯，佥事；弟礼，左副都御史。文思入馆时，文宪正司教习。

文思过邑城，座客有持败篋故券证以争产不已。公以齿，坐独下，独抗声曰：“若券果出革除年庚辰，当以建文三年书。今称洪武三十三年，贗可知矣。”一座皆服。

宋南渡时，屠姓兄弟二人自陈留随行，一居鄞，一居嘉禾。代豪富。国初籍没，有一公者，赘杨氏得免。未几，杨亦被籍，复以异姓免。数传为康僖公。同时居鄞为康惠公。子孙皆有冠冕。今乍浦教场，广袤约三里，相传为屠旧居。

康僖公长子应垞，辛未进士，历参政。踔厉慷慨，甚有时誉。后家居过自贬约，多靳恤，佳客过从，不设饮食，虽子孙亦

琐琐不忍予，与居官时若两人。或谏之，曰：“吾恶夫拥货而身安逸，乐厚自奉养，以馀沥媚人者。”

刘李有兄

刘忠愍公球既没，权贵人犹衔之不置，将采危语倾其家。公之伯兄理，号益轩，奋曰：“是不可坐待也。”即日戒行李，诣阙白其情。且踵权贵门，直以事告，其人亦惭而止。后其子与忠愍子皆至大官。

李崆峒先生之兄曰孟和，字子育，号北野。为儒不成，能殖财，第宅田园，壮丽膏沃。崆峒触瑾下狱，事急，家人俱逃散，公大出货，往来宾客，游说万端，卒脱于死。公好气慷慨，性友爱，喜施，盖奇人也。年七十五卒。子女各四，□□，丙子举人。九孙，用恒、用谦、用观，皆有文名。

忤兄请罪

方献夫之父遂，全州学正，遗腹生献夫。后以大礼拜相。五十即致仕。尝笞其家奴，忤兄茂夫意，至置酒长跪请罪。

敬兄之怒

严凤号溪亭，归安人，以御史归家。族兄某老而贫，迎养，凡宴客必令兄递盏，自执箸以从。一日，进箸稍迟，兄反顾，怒批其颊，欣然受而应之，终席尽欢。既醉，送兄归卧而后出。日未明，已候榻前，问昨饮鬯否，卧安否。每诫家人曰：“事有误，

我容得，大爹容不得，扶汝矣。”以寿终，恸哭，葬之尽礼。

兄弟贤贵

苏、松二府同时兄弟并贵且贤者，太仓王阁学文肃公，弟太常少卿和石，名鼎爵；王凤洲尚书，弟南太常少卿麟州，名世懋；云间陆尚书文简公，弟金都御史阜南，名树德。称一时盛事。更有异者，兄皆极贵，弟皆京堂四品，又皆先卒。而三家子姓登第者，二王各一人，皆长公出；陆二人，兄弟分出，三家三代共十人，两解元、两会元、两会魁、两榜眼，尤奇之奇。

起家工部

苏州皇甫氏兄弟，洙，字子安；濂，字子约；汧，字子循，皆起家工部，止于部郎僉事。其父录，亦以工部改礼部，官太守。我湖竹墩沈氏兄弟，子木，字汝楠；子来，字汝修；倬焯，字仲亨；倬□，字叔永，亦皆工部。子木官至右都，倬□见南京兵部侍郎，与倬焯皆右都之子。两家初任授官相同，进士同，而沈氏官最显且贤。堪舆家传其所居地前后宛如“工”字，地之能印人如此，理或有之。

三 仲

席书号元山，正德庚戌进士，由户部主事、方伯、中丞，以议礼，至大学士、少保，谥文襄。季弟春，丁丑进士，号虚山，庶吉士、御史，以兄贵，改检讨，进少宗伯。季弟彖，号梅山，

甲戌进士，给事，贬死，赠光禄少卿。蜀中以三席比“三苏”。文襄幼时，梦涪江涨落，见沙砾之碑，其文曰“三仲连芳”，果应其兆。近年蜀中有三黄，则予同年黄慎轩辉，官少詹事；弟缜轩炜，官按察使；弟烨，举人。楚中有三袁，则丙戌会元袁玉蟠宗道，官左庶子；弟季修宏道，官吏部主事；弟小修中道，丙辰进士，皆奇才也。

兄弟年远甲科

同胞兄弟登甲科者最多，然其年皆不甚远。惟庐陵习先生孔教，嘉靖戊午解元，隆庆戊辰进士，官礼部侍郎。卒且三十馀年，而其弟孔化，以万历戊午举乡试，去其兄刚一甲子。明年进士。其父亮封编修。兄弟相去若隔异代，虽曰幼子，然其父之高寿亦可知已。

兄给得归

上海人刘铄坐法被系京师，其弟钝，阴祈守者代兄，令得一见家人，归死。钝既代，而铄归，给其父母，云“已得赦归，钝以客死”。钝系而兄不至，士大夫皆知其冤，为馈饮食。久之，赦归，扣门，家人惊以为鬼。母泣曰：“儿馁欲求食，吾自祭汝，勿怖吾也。”钝哭，历历具言不死状，乃纳之。铄闻，逸去。钝生二子，玉、珣。珣进士，建宁太守。玉子充，汀州通判。充子兆元，怀庆推官。

义 姊

陆浚明以直谏谪远恶地，妻没，二子幼。时令严，当速往，其姊嫁口氏，舍其家以来，为育之。至长，浚明自永新令谢事，姊乃归。吴人义之，以比鲁之义姑，姊遂以称之。浚如事如母终身。

妇人知兵

上源驿之变，以李克用雄武，即宜发兵剪朱全忠矣，然竟以刘氏言而止。盖左右勇士多死于难，其气已竭，且孤军无后继，势不可轻用，欲而不能，非能而不欲，刘氏亦姑托辞，真女丈夫也。太原被围，克用欲走，刘氏谏止，亦与此同。自来妇人知兵，无若刘氏。

女 将

女人有军功者尽多，然无若顾琛之母孔氏。孔年已百馀岁，晋安帝隆安初，王廋吴中作乱，以女为贞烈将军，悉以女人为官属。及孙恩乱，东土饥荒，人相食，孔氏散家粮以赈邑里，活者甚众。生子皆以孔为名。

孝烈将军，隋断帝时人，姓魏氏，本处子，名木兰，毫之谯人也。时方征辽募兵，孝烈痛父耄羸，弟妹皆稚穉，慨然代行。服甲冑，鞬囊操戈，跃马而往。历一纪，阅十有八战，人莫识之。后凯还，天子嘉其功，除尚书不受，恳奏省视。及还谯，释

其戎服，衣其旧裳，同行者骇之，咸谓：“自有生民以来，盖未之见也。”遂以事闻于朝。召赴阙。帝方恣酒色，奇之，欲纳诸宫中。对曰：“臣无媵君之礼。”以死誓拒，迫不已，遂自尽。帝惊悯，追赠将军，谥孝烈。土人立庙，岁以四月八日致祭，盖其生辰云。

妇女有须

李光弼之母李氏，封韩国太夫人，有须数十，长五寸，为妇人奇贵征。（光弼姓李，而母亦姓李者，盖父原契丹赐姓故也。）

闽林文恪母黄太夫人亦有须寸许。黄有奇术，立柱下卜吉凶，其术莫知所自来。立柱以晴日向日月趺坐，徐伸两手加额，默视，引右肘于鼻端，凝视久之，渐见小如一发，吉；大则凶。卒之年，谓诸子曰：“今年不佳，吾立柱几如股矣。”果卒，年八十一。

弘治六年五月丙寅朔，湖广应山县民张本华之妻崔氏生须，长三寸。

贤夫人

胡端敏之夫人李氏，不妒，亦不自识其贵。有问汝夫历几官，今何品列，应曰：“丈夫自知之，妇人焉用识此。”以寿考终。

乔刘二妾

乔白岩太宰卒，妾二人缢死。刘白川尚书有二妾亦如之。两公其以情感耶？抑选得贞烈人而后娶，故若此耶？亦奇。

长爪妾

翠娥秀，娼家女也，以处子适松江管军副万户薛彻都为小妾。都卒，谨护其爪，不肯嫁。卒完其志，年逾八十，爪长尺馀，卒。

暗妾

严澂，字道彻，文靖公之仲子也。年三十无子，纳妾二人，皆陋。一日，过姻家，见侍女年且及笄，而尚未蓄发，询其故。主人以素暗，即蓄发，孰收之？澂惻然，谓第使蓄发，吾将以为妾。其人以为戏，未信。复为申约，卒娶之。文靖闻而喜曰：“儿合天道，必有后。”后三妾皆生子。澂素持白衣陀罗尼，且坚守不杀戒，凡举子多重胞之征，人皆异之。安小范又云，三妾一暗一聋。

姊妹继娶

古人娶妻，多以姊妹为媵。唐、宋甚稀，或先娶死，而续其
· 缘圆 ·

妹者。入国朝益稀，惟濮阳李伯承先芳，元配盛卒，继任氏，即以妹助筵焉，号曰仲任、季任。仲任卒，继许氏，又卒，乃以季任为内主。伯承豪宕，为尚宝少卿，能诗文。无子，年八十四卒。

妒后化龙

梁武帝郢后以妒忌，化蟒入梦，帝为忤礼，得复为好女子来谢，释家及小说往往见之，今“梁皇忤”是也。而《南史》谓其化龙，入于后宫，通梦于帝，或见形，光彩照灼。帝体将不安，龙辄激水腾涌于露井上。旧殿衣服委积，常置银鹿卢金瓶，灌百味祀之，故帝终不立后。其说小异。或先为怪，如史所称，而后得度，未可知也。（妒妇化为异类，理或有之。谓蟒为龙，殆史氏文饰之词。）

妒 妇

邹观光，字孚如，楚人，有才名，为南京光禄少卿。余起家南司业，自幸得一见请益。比至问之，则送客江东门，暴没舆中。甚骇之。一日，刘司成座中谭及，吭慨，且曰：“邹精神甚旺，而厄于妒妇。”尝一日相遇涂中，拉归寓所，从容谈笑甚适。呼进午饭，其妻内捶一婢，声彻客座。邹已失色，刘逡巡辞归，邹又固留。捶久不让，声愈厉，其婢气垂尽。刘跼蹐告辞，邹面如土，竟出门而去。未数日变闻。盖妒妇之为害如此，亦可怜也。

正德八年，刑部主事陈良翰妻程氏杖杀女婢，解尸置木柜中。他日复缚一婢，欲刃其胸，婢脱走得免。东厂廉得其事，并

良翰俱下锦衣卫狱，拷讯得实。都察院覆议，程氏穷凶极惨，比拟故杀律斩；良翰纵妻为恶，谪戍边卫。

俗语谓法马为乏子。乏者，法字之讹也。谓兑架为天平，由来尚矣。吴中有天平山，山石林立，皆剑拔，甚锐而匀，真奇观也。学宪范长白得之，曲折筑园奇巧，夫妻时游其间。妻徐氏，能诗而妒，范遂无子，情甚笃。苏州人为之语曰：“范长白夫妻上天平乏子。”闻者大笑。长白名允临，能文章，精书法，名与董思白相亚。年尚壮，闻已得子，可塞苏州人之口。

蒸 衣

中朝宠，貌魁伟，能读书，福清人。初娶魏，再娶林。林悍甚，与魏子新不相能。新去之三山，林复与妯娌日阅争宠，不能禁也。一日，林忽语其所善：“吾夜梦一绯衣神人持炬火蒸我，我避之不能，觉而体犹痛，此何祥也？”次日，林就爨下炊，火飞出，焚其衣。衣带结不可解，仓皇以水沃之，愈沃愈扬。遍体糜烂生蛆，臭秽难近，竟死。

妻妾投缢

钱首曾，号瞿轩，常熟人，嘉靖庚戌进士，为兵部郎中。遇妻妾严。舍中风烈，所挂蒲织稍触损，皆惶惧，投缢死。事闻世庙，下法司廉其事，无他，且在署，得不坐。后娶一室，不受绳束，或骂詈，即反唇。托郊行，约友人纂取之去。

妾 祸

吴中张献翼夺军人蒋贵妻王二为妾，嬖之。张夜宴，五鼓就寝，蒋操刀伏山石中，先杀张及王，并门客七人。手提灯自厕逃，遇一妇人，不见也。妇人愕立如撞，溺其身去。次日就擒，投河而死。张为人多怪，携卧具，宿府县狱中各二夕，自为犯人，使持大杖痛笞之，三下不见血者，反与杖。（今有人自作罪囚，向城隍座下者，与此正同。）自称朝奉，人称亦如之方喜。

家庭之累

君子每处家庭不幸事，真可怜。瞿洞观，有道人也，娶徐司空凤竹之女，悍甚，忤其姑李夫人，至愤死。洞观逐居别室，司空讼于官，十余年，洞观卒不屈，上书以死自誓，且许再嫁，乃得免。同时严中翰治亦有此苦，欲离异。文靖公以妇翁相与厚，命姑忍。公没后，乃行其志。中翰以贵公子能文章，被服儒素，外处休鬯，而中多邑郁。以此，近日士大夫有为子所累者尤多，真是不可解之业冤。余妇甚拙，不我扰。二子不甚学问，性颇因循。此一节犹有可虑。偶感书此自幸，且励二子，毋荼毒老人为也。

人有有志为善，而兄父不见亮，反挟子弟之势横行者。如云间张状元瀛海，诤以诚，刻意自立。父兄不佳，里中有来诉者。稍进正言，便受荼毒，无如之何。后凡来诉者，告云：“汝只去诅张状元死。如死了，父兄无可恃，汝辈庶得免累。”果万历乙卯暴歿。去登上第仅十五年。真可怜！真可怜！乃若子弟奴仆为政，而我辈不能禁，则己必有过焉。奴仆犹可言，子弟之穷凶极

恶者，圣贤豪杰亦不能化也，而况我辈乎！

善处侄仇

宋王之望之父纲，襄州穀城县人。家饶，好行善。其侄任气好酒，与无赖子为仇，时相斗。呼无赖子，与钱十万，使市布房陵。众皆争，谓一去必不来，不答。无赖子得钱，醉酒蒲博，数日尽，遂遁去。争者咎之。纲曰：“吾非不知。此人得钱而改化为良善，益莫大焉；今其逃，与吾侄无杯酒之衅，是以百千去之，所以两全也。”靖康之乱，襄、汉被祸尤酷，独王氏仅存，之望贵显，则积善之报也。

子 孙

齐神武子侄多夷灭，独清河王岳，谦约畏慎，故其孙士廉以文行昌显。梁武子孙亦多夷灭，惟昭明太子，孝友下士，故其子岳阳王誉，立国江陵，传数世。其后名德相闻，与唐终始，萧瑀、萧俛等俱贵盛，八叶宰相。孰谓无天道乎？

谢玄立功于晋，盛矣，而子免不慧。殷景仁辅宋文帝为宗臣，卓矣，而子道矜亦不慧。免子灵运有俊才，至不保身。道矜之后更无闻者。

桓玄虽灭，其子诞，字天生，年数岁，流窜太阳蛮中，多智谋，为群蛮所宗。属于魏，为太都督、襄阳公，卒，谥曰刚。子晖袭爵。卒，弟叔兴袭，立功，传者数世。

桓冲尽忠王室，史传亟称之，即刘裕起义，亦全一孙示报。乃冲存时，朝议用谢晷为江州刺史，冲怒，奏晷文武无堪，遂自领州事。吁，横亦甚矣。盖将门之习，即忠顺亦不能尽革也。桓

彝儒者，以忠死，而诸子皆以武显，卒至灭门，可惜，可惜！

王猛子永，起义佐苻丕，死。永弟休。休子宪，仕魏为并州刺史、北海公，卒年八十九。世世显重。太原王氏本田齐之后，田氏称王家，子孙因以为氏。

王安石，生性执拗，已自不幸，又生出儿子不才，放泼短命，受了多少谤议，多少悲哀。范文正之子最多最贤，西夏用兵，即一有病，儿子得其力不小。宋璟四子皆不肖。韩休五子皆贤，幼滉，亦至宰相。天之待人，其亦偏有轻重耶？

安石子雱为待制卒，有兴化尉胡滋，妻宗室女也，自言梦中人衣金紫，云“王待制来为夫人儿”，妻寻产子。安石闻之，自京师至金陵迹访。与夫人常坐于船帘下，见船过辄问：得非胡尉之船乎？既而得之，举家悲喜，亟抚视泣涕，遗之金帛，不可胜数。邀与俱还金陵。滋言有捕盗功，应诣铨求赏，介甫使人为营致，除京官。留金陵且年馀，欲得此儿，其母不可，乃遣之。

安石女嫁蔡卞，知书能诗，蔡凡事先与谋，然后行。乃拜相，优人戏曰：“右丞今日大拜，皆是夫人裙带。”蔡嘻而不言。后卒以败名。荆公生子女皆聪俊，其败类流祸乃尔，真间气之钟也。

宋学士之祸，孙慎，字子畏，以洪武十三年庚申岁十月二十八日死，年二十七。次子璲，字仲珩，以是年十二月八日死，年三十七。一子。璲之子恽，从祖父子性以丧归。长子瓚，字仲圭，与恽同学士赴贬所。学士次年五月歿于夔。瓚以洪武十九年丙寅四月十日歿于茂州安远驿傍之蓬簇。惟恽以孤童治丧。三子慎先死，恽、恂继之。幼子怀，以卒之年始生。嗟哉，学士事圣主而不克终，三世颠沛流离至此，亦可怜矣。

毛东塘长子□，号白山，长厚质直，中怀泾渭，多识典故，善别人物。子世卿举乡试，不少见喜色。终太保之世，无盛满之咎，睚眦之隙，皆其力也。太保颇疵其短智。罗念庵在坐，解曰：“公胡责细行而忘大节？”太保惊问状，曰：“《礼》不云乎？